

PIDAGING
MAKA BANTANG AWIG-AWIG
DESA PAKRAMAN SIDAKARYA

MURDHA-CITTA	1
Prathamas Sargah ARAN LAN WEWIDANGAN DESA	1
Dwityas Sargah PATITIS LAN PAMIKUKUH	3
Trityas Sargah SUKERTA TATA PAKRAMAN.....	3
Palet 1 INDIK KRAMA.....	3
Palet 2 INDIK PRAJURU	12
Palet 3 INDIK PARUMAN.....	15
Palet 4 INDIK KULKUL.....	18
Palet 5 INDIK PADRUWEN DESA.....	20
Palet 6 SUKERTA PAMITEGEP.....	22
Kaping 1 KARANG, WAWANGUNAN, LAN PAPAYONAN	22
Kaping 2 WAWALUNGAN	23
Kaping 3 DUSTA LAN BHAYA	24
Kaping 4 PANYANGGRAN BANJAR.....	26
Caturtas Sargah SUKERTA TATA AGAMA.....	27
Palet 1 INDIK DEWA YADNYA.....	27
Palet 2 INDIK RSI YADNYA (KAWIKON / GURU LOKA)	30
Palet 4 INDIK MANUSA YADNYA.....	35
Palet 5 INDIK BHUTA YADNYA (KASUCIAN – DESA)	36
Pancamas Sargah SUKERTA TATA PAWONGAN.....	39
Palet 1 INDIK PAWIWAHAN.....	39
Palet 2 INDIK PALAS MARABIAN	43
Palet 3 INDIK SANTANA	44
Palet 4 INDIK WARISAN	45

Sad Sargah WICARA LAN PAMIDANDA.....	48
Palet 1 INDIK WICARA	48
Palet 2 INDIK PAMIDANDA	49
Saptamas Sargah NGUWAH NGUWUHIN AWIG-AWIG	51
Asthamas Sargah PANUTUP.....	51

AWIG-AWIG DESA PAKRAMAN SIDAKARYA
MURDHA-CITTA
OM

Om Swastyastu.

Om Awighnamastu Nama Sidham.

Mangkana panamaskara mami kabeh ring Hyang Parama Siwa sidha amanggih dirgayusa lan dirgahayu, tan kataman lara pinakangulun kabeh Krama Desa Pakraman Sidakarya.

Putusing pasabhan Krama Desa Pakraman Sidakarya, apan wus puput wirasaning pangulu sami, minakadi Kepala Desa, Bendesa Pakraman lan Prajuru, Sabha Desa, ping kalih para Panglingsir Desa, Pamangku-pamangku, ping tiga Kelihan-kelihan lan Prajuru Banjar pariindik nguwah-nguwuhin awig-awig Desa Pakraman, wastu kasidan prayo jana mami kabeh, prasama angidep, muwang amanggehaken kadi linging awig-awig iki:

Prathamas Sargah
ARAN LAN WEWIDANGAN DESA
Pawos 1

- (1) Desa pakraman puniki mawasta Desa Pakraman Sidakarya
- (2) Jebar kakuub wewidangannya, mawasta nyatur desa luire :
 - ha. Sisi Lor (Kaja) : Desa Pakraman Panjer lan Renon.
 - na. Sisi Wetan (Kangin) : Desa Pakraman Panyaringan lan Intaran.
 - ca. Sisi Kidul (Kelod) : Selat Badung.
 - ra. Sisi Kulon (Kauh) : Desa Pakraman Sesetan.
- (3) Kakuub wewidangan desa, manut dresta luire :
 - ha. Papulan karang pumahan, sinanggeh palemahan Desa Pakraman.
 - na. Setra, sawah miwah tegal ring kakuub wewidangan desa sajabaning palemahan Desa Pakraman manggeh telajakan desa.

Pawos 2

- (1) Desa Pakraman Sidakarya kepeah dados banjar-banjar luire :
 - ha. Krama Banjar Dukuh Mertajati Sidakarya
 - na. Krama Banjar Tengah Sidakarya
 - ca. Krama Banjar Sekar Kangin Sidakarya
 - ra. Krama Banjar Suwung Kangin Sidakarya
 - ka. Krama Banjar Sari Sidakarya
- (2) Miwah salanturnyane krama banjar tiosan ring ajeng sane malih jagi wenten, ring kakuub wewidangan Desa Pakraman Sidakarya.
- (3) Wates wewidangan palemahan Banjar kamanggehang antuk paruman Desane.
- (4) Anut ring munjuk lungsur cacah jiwana pawongannya pahan-pahan Banjar rauning wates wewidangan wenang robah manut pamutus Paruman Desa.
- (5) Banjar wenang ka-pah dados tempekan manut pararem Banjar.
- (6) Banjar patut madruwe piranti-piranti pamekasnyane Bale Banjar miwah Kulkul.

Pawos 3

- (1) Banjar wenang / patut ngardi awig-awig miwah pararem-pararem maka pamikukuh.
- (2) Awig-awig miwah pararem Banjar nenten dados lempas ring awig-awig miwah pararem-pararem Desane, saha kalingga tanganin antuk Bendesa Pakraman, maka pamikukuh mangda dados kamargiang (kalaksanayang).
- (3) Sahanan tempekan tan wenang ngardi awig-awig miwah pararem, santukan tempekan kemaon mawak pahan, sinanggeh tangan sukuning banjar.

Dwityas Sargah
PATITIS LAN PAMIKUKUH

Pawos 4

Desa Pakraman Sidakarya puniki ngamanggehang dasar :

- (1) Pancasila
- (2) UUD. 1945 Pamekas Pasal 18.
- (3) Tri Hita Karana manut tatwaning bhuwana agung.
- (4) Perda Provinsi Bali No. 3 tahun 2001 indik Desa Pakraman.
- (5) Perda Provinsi Bali No. 3 tahun 2003 indik pawahan perda No. 3 Tahun 2001 indik Desa Pakraman.

Pawos 5

Luir patitis Desa Pakraman Sidakarya :

- ha. Mikukuhin miwah ngrajegang Agama Hindu.
- na. Ngrajegang kasukertan desa saha pawongannya sami sekala kalawan niskala.
- ca. Ninggilang kasukertan pawongan sekala niskala, mustikannyane nincapang pangaweruh lan pangupa jiwa ikrama.
- ra. Ngrajegang kasukertan saraja druwening desa miwah banjar kalih pawongannya sami.

Trityas Sargah
SUKERTA TATA PAKRAMAN

Palet 1

INDIK KRAMA

Pawos 6

- (1) Sane kabawos Krama inggih punika kulawarga sane ma-Agama Hindu jenek magenah netep ring palemahan Desa Pakraman Sidakarya.

(2) Krama inucap ring ajeng luire :

ha. Krama ngarep.

na. Krama panyanggra.

ca. Krama tamiu.

Pawos 7

(1) Sahanan warga desa sane sampun marabian patut ngawit tedun makrama desa.

(2) Satunggal krama manut karendahan kulawargannya patut keni ayah sinalih tunggil:

ha. Ayah ngarep utawi

na. Ayah balu.

(3) Ayah ngarep sane wenten santanannyane kaseledihin olih santanannyane inucap, sane kawastanin pangayah.

(4) Krama balu anut linggih krama, makadinya :

ha. Krama sane balu ngempu oka lanang wiadin istri kantun alit, mangda ma banjar patus (keni ayah nyibakin).

na. Balu ngempu oka lanang sasampun alaki rabi keni urunan miwah ayah mepek (mamungkul).

ca. Balu putung luh wiadin muani, kakuub ring pakadangannyane.

ra. Babaluan luh boya santana, patut ngamargiang / ngamanggehang pati-brata, teges ipun, satya aguru laki tan dados para dara (mamitra).

ka. Babaluan sane mamitra dados katundung antuk ipianak, yan ipianak kari alit wiadin yan tan madue pianak antuk pakadangan muanin ipun sane pinih tampek.

da. Babaluan sane katundung wiadin sane saking manah ipun ninggalin umah muanin ipun pecak, dados nguasayang atenga saking pupulan guna kayan ipun sareng muanin ipun pecak.

- ta. Sapunika taler babaluan muani sane wit nyeburin santana luh, manut kadi
6 (enem) ring ajeng.

- sa. Babaluan luh, sane wit waris guna kaya kakuasayang antuk ibaluan punika, nanging tan dados ngadol / gadeang / makidiang tur tios-tiosan, yan tan polih kabebasan saking pianak wiadin pakadangnya sane pinih tampak / saking kapurusan pakurenan ipun.
- wa. Balu ngempu madue pianak kakalih, sane kelihan istri, wenten anak ngambil / ngarangkatan, pianakne cerikan muani kantong alit wenang reramannyane nyelang ayah mantunnia, wekasan ring sampun pianaknya muani ngamet rabi, mangda mantun ipun ngaturang ayah matuan ipun ring parareman banjar.

Pawos 8

- (1) Kulawarga magama Hindu weddan iriki miwah wiwitan warga desa tiosan, tur yan sampun alaki rabi, wenang ngranjing makrama desa pakraman prade pacang nerus jenek netep magenah (mapumahan) ring wewidangan Desa Pakraman Sidakarya manut kadi pawos 1 (3), 1.2.
- (2) Sasida-sidan taler mangda tedun mabanjar suka duka ring banjar sane pinih nampek kagenahin, tur wenang ipun tinut ring pasuka duka babanjaran punika, tegesnyane sapisira ugi kapatutan mabanjar nanging tan dados selak-seluk, mangda manut kadi pawos 2 (2), (3).
- (3) Taler sang saking lian desa ayat ngranjing mabanjar, mangda pateh anut kadi (2) ring ajeng, tur saha atur supaksa ring kelihan banjar sane ngawidangan genah paumahannyane. Atur inucap ring ajeng kaduluran antuk ilikita saking banjar / desa wiwitannya ngenanin indik pa kudannya.
- (4) Wungkon-wungkon desa wiadin banjar mangda kacirinin / kadagingin tanda utawi wates lan aran, sane mastikayang wewidangan jebar desane, wiadin banjar, manut kadi tatujon pawos 8 (2), (3).

Pawos 9

- (1) Sahanan warga desa sane sampun anom miwah daha, soang-soang patut ngayah, kawastanin ayah truna (sane lanang) miwah ayah daha truni (sane istri).
- (2) Ayah truna miwah daha punika kapupulang ring sekaa truna miwah sekaa daha / truni.
- (3) Sekaa-sekaa punika ka-pah manut soang-soang banjar.
- (4) Krama banjar sane tiosan ring banjar sane wed tan kakenin paturon / ayah-ayahan rikala ngarya upakara-upakara ngodalin wiadin ngaci parhyangan ring desane, nanging yan wenten arsane madana punia wenang desane nerima.
- (5) Indike ngenanin pesuan-pesuan (4) ring ajeng, gumanti sampun kasumuyubin kalih kacumpunin, manut pamutus pararem desane sane kamiletin antuk para wakil-wakil nyane wiadin utusan soang-soang banjar.
- (6) Warga tiosan utawi sane tan magama Hindu, magenah ring Desa Pakraman Sidakarya, rikala desane ngwentenang yadnya miwah aci, prade wenten arsannyane pacang madana punia, wenang desane nerima.
- (7) Nanging benjangan yan sira taler anangun karya, wenang taler desane ngwalesang, manut tatujon ngamanggehang paras-paros tulung tinulung, taler mikukuhin raketan / kaingkupan Agamane.

Pawos 10

- (1) Desa miwah banjar mapaweh laluputan ayah utawi pakena-kenan / pesu-pesuan ring sang inggiling linggih utawi ring sang kawelas-asih.
- (2) Sor singgih laluputane miwah bacakan sang luput kaunggahang ring pararem.
- (3) Sajabanin prajuru desa, sane pastika patut polih laluputan pamekasnya :
 - ha. Perbekel / kepala desa
 - na. Para sulinggih / panglingsir
 - ca. Para pamangku Kahyangan Desa

- ra. Sakit tahunan
- ka. Wang ceda angga banget
- da. Wang alit ubuh

Pawos 11

- (1) Swadharmaning krama desane tiosan ayah-ayah luire:
 - ha. Dreda atuang ring awig-awig, pasuara lan pararem-pararem desa.
 - na. Tan maren ngutsahayang mangda desane prasida nyujur tatujonnya manut patitis kadi mungguh ring pawos 5 ring ajeng.
 - ca. Masadok ring prajuru sajeroning arahina (24 Jam) prade nerima dunungan utawi tamu.
 - ra. Natak panes lan tis pidabdab kalih kertin desane.
- (2) Wang desa sinanggeh tamu patut :
 - ha. Tinut ring tatiwak desane nganenin indik ngupedi sukertan desane ring sekala.
 - na. Tan wenten tungkas ring pamargin kertin desane.

Pawos 12

- (1) Petias (ulih-ulihan) krama desane luire wenang polih pangayom prajuru manut dresta nganenin :
 - ha. Sangaskara kauripannyane sane mabuat, sane mastikayang iketan sulur pakula wargan.
 - na. Kasukertan miwah kasucian dewek, Parhyangan miwah karangannyane.
 - ca. Kasukertan druwenyane soang-soang.
 - ra. Kabawosin tur katiwakin pamutus sahanan wicarannya.

Pawos 13

- (1) Sahanan krama sane ngarobang utawi ngajak anak tiosan, lempas ring drestaning pakula wargan upami :
 - ha. Ngajak wang duduk- dudukang.
 - na. Nyama mulih saking makurenan.
 - ca. Jadma masundulang dewek.
 - ra. Rowang pastika jenek miwah sane tiosan, patut atur uning ring kelihan banjarnya.
- (2) Pasadok ring ajeng kaduluran antuk keterangan pastika, nganenin linggih, artha brana miwah tetegenan kramane kalih sang kaajak inucap.
- (3) Kramane sane ngrobang / ngajak patut tanggung sumakuta nagenang lampah sang kaajak arepa ring kasukertan banjar utawi desane.
- (4) Kelihan banjar ngunggahang pasadok punika ilikitanya, saha nyiarang ring paruman banjar.

Pawos 14

- (1) Krama sane nampi tamyu jantos makolem, patut nyadokang tamyu inucap ring kelihan banjarnya.
- (2) Prade tamyune pacang madunungan jantos lintangan ring awuku, i kelihan patut nureksain pisan mungguing maka buatnya miwah ilikita pastika sane nyihnayang maka sujatinya.
- (3) Bilih-bilih yan pacang madunungan jantos sasihan utawi tahunan suennya, patut kaunggahang ring ilikita banjar tur dunungan inucap patut sareng nedunin masuka-duka baya pati.

Pawos 15

- (1) Ngawit tedun ma-krama desa / banjar kalih ngwilang parubahan saha luring ayahan, ring rahina buda kliwon Wuku Dungulan (galungan), sabinanin nganenin ayah balu kawilang pramangkinan.
- (2) Sang wusan makrama kawilang pramangkin.
- (3) Ri sampun rauh rahina buda kliwon dungulan (galungan), kelihan banjar soang-soang ngawawinin nyahcah jiwa, ngawilangan kalih mastikayang pakrama miwah ayah-ayahan kadi ring ajeng (1) ring wewidangan soang-soang.
- (4) Kapastian cacah jiwa, indik pakrama wiadin ayah-ayahan kapikukuhin antuk pamutus paruman Banjar soang-soang dumugi kengin kalaksanayang.
- (5) Kapastikayang inucap digelis kasuratan ring ilikita (pipil utawi kartu) krama.

Pawos 16

- (1) Sinalih tunggil kulawarga wusan makrama desa, prade kulawarga inucap :
 - ha. Magingsir linggih saking wewidangan Desa Pakraman Sidakarya, sang wusan makrama sangkaning magingsir linggih patut nunas babebasan tur ilikita pastika saking Prajuru Banjar muah Desa.
 - na. Kanorayang antuk Desane, risampun majalaran papuikan salami 3 (tiga) warsa tur taler tan prasida ngeihin solah maprawerti.
- (2) Sulur tur tata nganorayang :
 - ha. Pastika wenten su dosan ipun.
 - na. Tan tinut ring pituduh prajuru indik nyipat raga ngeihin solah maprawerti.
 - ca. Katiwakin pamidanda norane antuk paruman Desa risampun kapastika antuk saksi, ilikita, bukti antuk Bendesa Pakraman.
 - ra. Pamidanda nganorayang inucap kaatur ring Pamerintah.
- (3) Sang wusan makrama desa tan wenten polih pah-pahan sangkaning druwen Desa utawi Banjar.

- (4) Desane wusan mapaweh pasayuban kasukertan sakaluire, arep ring sang kanorayang.
- (5) Banjar-banjar sajabagan Desa Pakraman Sidakarya tan wenang nampi wang kanorayang.
- (6) Sang kanorayang inucap ring ajeng kengin katedunang malih makrama maduluran antuk ayah utawi nawur linggih (batu-batu) sapatutipun.

Pawos 17

- (1) Krama Desa miwah Banjar sane tan nginutin swadharma lan tetegenan, miwah sane tiosan patut kadi ring sor;
 - Prade wenten Krama tan ngamedalang papeson majalaran salunglung sabayantaka inucap teleman ring patitis, wenang manut pararem desa pakraman;
 - ha. Tan kalugra ilikita kadinasan saluir pangaptinnyane.
 - na. Keni pananjung batu wirat akilogram beras nikel ring pawilangan krama desa utawi sapaon-paon, prade taler kapurug tan kalugra nganggen setra silih sinunggil rikapatian wargania, sawewengkon Desa Pakraman Sidakarya.
- (2) Ritatkala wenten swakaryaning Desa muah Banjar sakaluire :
 - ha. Wenten sinalih tunggil krama masemperan / masesimbing utawi majengak rowangnia tur parebate manadi yeg pada sami wirosa ring ajeng sang akueh, tiben ulu desa / banjarnia kawastanin, patut dinanda wang ika manut pamutus pararem desa / banjar.
 - na. Rikala di pura genah rebate mangda mrayascita pura, sapunika taler yan ring banjar, mangda mrayascita banjar miwah matambah danda sapatutnya.
 - ca. Malih yan prade wenten krama ring paruman desa / banjar ngamedalan suara ghora, tur pangeleng suaranya ngawur jadmia punika prasangga ring sang akueh, wenangipun mrayascita desa / banjar, riwus punika didanda ia sapatutnya manut pamutus pararem desa / banjar.

- ra. Rikala desa miwah banjar ngawentenang paruman wenten sinalih tunggil krama sampun polih arahan tan rauh saha tan mapuankid, wenang kena danda wang punika, manut pamutus pararem desa / banjar.
- ka. Rikala desa / banjar parum wenten sinalih tunggil krama matilar / ninggalin paruman tan sangkaning wenten sadu miwah pituduh prajuru, wenang ipun danda sapatutnya manut pamutus pararem desa / banjar.
- da. Prade wenten paruman desa / banjar, risampun wus puput kasumuyugan ring sang akueh, benjangan wenten sinalih tunggil krama malih angugat, wenang wang ika didanda manut pamutus pararem desa miwah banjar.

Pawos 18

- (1) Prade wenten krama sane manggeh kadadosang pangulu, sakeluring pangulu desa, makadi kelihan, mangliru aken padrebeyaning desa miwah banjar, punika wang ngalingga caya ring sang akueh, wenang dinanda wang ika kadi arganing dreben desa / banjar.
- (2) Krama nyasar laksana punika kangkat kawusan nadosang prajuru risampun puput polih pamutus, manut pararem desa / banjar.

Palet 2

INDIK PRAJURU

Pawos 19

- (1) Desa Pakraman Sidakarya puniki kaenterang olih Bendesa Pakraman.
- (2) Banjar miwah tempekan kaenter antuk Kelihan Banjar miwah kelihan tempek nunggal-nunggal.
- (3) Bendesa Pakraman, Kelihan Banjar miwah Kelihan tempekan kaadegang malarapan antuk pamilihan olih parumannya soang-soang nyabran 5 (limang warsa).

- (4) Prajuru-prajuru kadi inucap ring ajeng (3) kangkat kapilih malih sajawaning wenten pariindikan tios.
- (5) Sahanan Kelihan patut mawiwit Krama ayahan ngarep.

Pawos 20

- (1) Bendesa Pakraman miwah Kelihan Banjar soang-soang kasanggra antuk :
 - ha. Panyarikan, pinaka juru surat utawi wakil.
 - na. Patengen, pinaka pangamong druwen desa.
 - ra. Kesinoman, pinaka juru arah.
 - ka. Kelihan banjar / patus, pinaka tangan sukuning kelihan desa ring soang-soang babanjaran.
- (2) Wawilangan panyanggrane madudonan anut agung alit karya miwah gagambelan.
- (3) Prajuru inucap ring ajeng (1), kasudi olih Kelihannyane soang-soang.

Pawos 21

- (1) Swadarmaning Prajuru Desa / Bendesa Pakraman miwah Kelihan Banjar soang-soang luire :
 - ha. Ngenterang pamargin awig-awig pasuara miwah pararem-pararem desa / banjar.
 - na. Nuntun tur ngenterang warga desane ngupadi anut patitis.
 - ca. Ngraksa saha ngatur tatane ngangge saraja-brana druwen desa / banjar.
 - ra. Nuntun saha nyaksinin tata cara miwah sangaskaraning kahuripan mabuat sane nglintang sulur pakulawargane.
 - ka. Nuntun saha ngenterang i warga desa / banjar ngupadi nginggilang Sang Hyang Agama, kasucian kahyangan-kahyangan, kasucian pawongan, kasucian palemahan, miwah tata caraning nganggen setra.

- da. Mawosing kalih niwakang pamutus marep ring wicaran desane / banjar.
 - ta. Maka duta desa utawi banjarnyane matemuang bawos ring sapa sira ugi.
 - sa. Miwah sane tiosan manut drestane.
- (2) Tata-cara tiosan nglaksanayang swadharma ring ajeng, tan maren patut anut ring daging awig-awig, pararem, dresta miwah pamutus-pamutus paruman desa utawi banjar.
 - (3) Panglaksana ring ajeng patut kasiarang ring paruman desa utawi banjar kapungkur ipun.
 - (4) Bendesa Pakraman miwah Kelihan Banjar, suma kuta natak pamutus paruman desa utawi banjar nganenin panglaksanaan swadharmanya soang-soang.

Pawos 22

Patitis utawi olih-olihan prajuru sakadi ring sor puniki :

- (1) Bendesa Pakraman, Kelihan Banjar, Panyarikan lan Patengen polih luire :
 - ha. Upon-upon kawekas prade desane kasubagian pabuktian, kalih madruwe karang desa / karang laba pura, patut mapaweh dana lan brana.
 - na. Leluputan saking pesu-pesuan.
 - ca. Polih laba rikala mapaolahan.
 - ra. Miwah olih-olih (laba) tiosan manut pararem desa utawi banjar.

Pawos 23

- (1) Swadharman prajuru-prajuru tiosan wantah nyanggra nyerayanin Bendesa Pakraman, utawi Kelihan Banjar soang-soang manut dudonan.
- (2) Olih-olih prajuru inucap manut kadi daging pararem desa utawi banjar manut dudonan.

Pawos 24

- (1) Bendesa Pakraman miwah Kelihan Banjar ring sajeroning nglaksanayang swadharmannya patut mawirasa ring para Panglingsir, pamekas rikala wenten pakewuh ring desa utawi banjar.
- (2) Panglingsir inucap kawenangan mapaweh, bawos pinaka tetimbang ring Bendesa Pakraman utawi Kelihan Banjar yadiastun tan kawidi.
- (3) Mungging pawilangan para panglingsir Desa Pakraman manut makueh Banjar pinaka duta soang-soang banjar.
- (4) Makueh pawilangan Panglingsir banjar manut kabuatan miwah kawigunan soang-soang pabanjaran.
- (5) Panglingsir ring ajeng kasudi antuk paruman desa utawi banjar nyabran 5 (limang warsa) tur kangkat kasudi malih sajawaning wenten parindikan tios.

Palet 3

INDIK PARUMAN

Pawos 25

- (1) Luir paruman sane wenten ring desa :
 - ha. Paruman desa.
 - na. Paruman banjar.
 - ca. Paruman prajuru desa.
 - ra. Paruman sekaa truna-truni utawi daha truna.
- (2) Sahanan paruman sidha lumaksana yan sampun katedunin antuk sang patut nyarengin, majalaran suaran kulkul saha abusana nyelempot manut dresta.
- (3) Sahanan pamutus kautsahayang pisan mangda malarapan antuk suara gilik-saguluk utawi beriuk siu bilih tan prasida suarane makehan sinanggeh pamutus.
- (4) Ring sahanan paruman tan maren kamanggalain antuk pangarcana ring Ida Bhagawan Panyarikan, masarana widhi wedana utawi cane.

Pawos 26

Sahanan ayah ngarep miwah ayah balu, patut nyarengin paruman desa miwah banjar, saha wenang mastikayang pamutus.

- (1) Sahanan ayah tiosan (ayah daha / truna) wenang nyarengin paruman nanging tan wenang mastikayang pamutus.

Pawos 27

- (1) Paruman desa pakraman kawentenang sanistane awarsa sapisan, nemoning sasih ka sanga.
- (2) Luir paruman banjar kawentenang nyabran 6 (enem) sasih sapisan luirnya, buda kliwon wuku dungulan.
- (3) Ngangken paruman ring ajeng, Bendesa Pakraman utawi Kelihan Banjar patut nyiarang pamargin ngenterang Desa utawi Banjar, pamekas nganenin indik :
 - ha. Munjuk lungsur ring pakraman utawi ayah-ayahan.
 - na. Panelas miwah sulur arta brana druwen Desa utawi Banjar.
 - ca. Pamargin usaha-usaha Desa / Banjar sane mabuat.
 - ra. Sahanan wicara saha pamutus-pamutusnya.
 - ka. Daging pararem-pararem miwah pasuara-pasuara sane mabuat.
 - da. Rencana Prajuru nganenin usaha Desane / Banjar kapungkur.
 - ta. Miwah sane tiosan.
- (4) Sahanan jarwakan / siaran ring ajeng katitenin saha katiwakang pamutus antuk paruman Desane / Banjar.
- (5) Pamutus paruman inucap ring ajeng, sinanggeh sepat siku-siku patut katinutin antuk warga Desa / Banjar sami, pamekas antuk Prajuru.

Pawos 28

- (1) Sajaba kadi munggah ring ajeng, paruman Desa patut kawentenana prade kawidi olih Krama Desa sanistane sareng 3 (tigang) banjar.
- (2) Sang ngawidi patut mastikayang bantang bawos sane sandang pacang bawosang ring paruman inucap.
- (3) Paruman Desa inucap taler katiwakang pamutus manut kadi munggah ring ajeng.

Pawos 29

- (1) Paruman Desa miwah Banjar patut ngamedalang pararem-pararem anggen mitegepin Awig-awig Desania nunggal-nunggal manut dedudon.
- (2) Daging sahanan pararem patut manut ring awig-awig.
- (3) Sane patut kaunggahang ring pararem makadinya :
 - ha. Dewasa ngawitin pamargin bantang daging awig-awig sane mabuat.
 - na. Rarincikan panyacah daging awig-awig sane mabuat.
 - ca. Agung alit danda, panikel-panikelnya, lan sahanan / sakancan punika.
 - ra. Tata sulur ngamargiang awig-awig.
 - ka. Miwah sahanan indik tiosan anggen mitegepin daging awig-awig.
- (4) Paruman desa wantah sinanggeh pangawisesa sane wenang nyelem putihang tata pangenter desa manut dresta.

Pawos 30

- (1) Paruman Desa Pakraman patut kawentenang sanistane awarsa.
- (2) Paruman inucap kaenter antuk Bendesa Pakraman.
- (3) Sahanan Prajuru wenang tur patut nyarengin paruman Prajuru Desa.
- (4) Paruman Prajuru Desa kawenangan wantah ngrincikang tata upaya nglaksanayang usaha miwah pangrencana saha luire.
- (5) Sahanan rerancangan, bilih-bilih rencana sane pacang niwakin ring krama, tan wenang kalaksanayang sadereng kapikukuhin antuk pararem Desa utawi Banjar manut dedudon.

Pawos 31

- (1) Paruman prajuru wenang ngamedalang pasuara-pasuara anggen mitegepin daging awig-awig desa.
- (2) Daging pasuara-pasuara tan patut :
 - ha. Saeloan ring daging awig-awig.
 - na. Manut ring Agama, miwah dresta.
 - ca. Pastika nyantenang agung alit pamidandanya yan kapurug.

Palet 4

INDIK KULKUL

Pawos 32

- (1) Kulkul Desa miwah Banjar-banjar tan wenang katepak yan tan manut kadi daging awig-awig puniki.
- (2) Paindik pasuaran kul-kul banjar-banjar pastika matiosan manut tatujon utawi ceciren luire;
 - ha. Tulud telu (3), tabuh telu (3), ciri wenten rare embas / lekad / lahir.
Suarannya : 000 = 000 = 000
 - na. Tulud kalih (2), tabuh telu (3), ciri wenten sinalih tunggil warga desa lanang / istri sane ngarangkat / ngalap rabi.
Suarannya : 00 = 00 = 00
 - ca. Tulud siki (1), tabuh telu (3), ciri wenten sinalih tunggil sane seda / padem / mati.
Suarannya : 0 == 0 == 0
 - ra. Tulud siki (1), tabuh ngarambat ; ciri wenten yadnya (panca yadnya).
Suarannya : 0.0.0.0.0.0.0.0.0.0
 - ka. Tulud Bulus gati nglantur; ciri wenten puun (kebakaran).
Suarannya : 000000000 gangsar.

- da. Tabuh biasa nganutin wirama ; ciri wenten swa karya.
Suarannya : 0=0=0=0=0= lambat = 00000 gangsar.
- ta. Tulus bulus, tabuh telu (3), ciri wenten ngamuk.
Suarannya : 000000000 (ciri patulung)
000000000 (ciri baya)
000000000 (ciri kalampusan)
- sa. Tulus kalih (2) nglantur; ciri pat gati kala / panca baya / ciri kamalingan.
Suarannya : 00= =00= =00= =
- (3) Kukul Desane tan wenang kasuarayang sajawaning mula wantah tengarane patut katiwakan ring wang Desane sami, upami yadnyan Desa, paruman / pakaryan wong Desa sagraha miwah bhayapati.

Pawos 33

- (1) Kukul Desa miwah banjar tan wenang kasuarayang yan tan sangkaning bebebaskan utawi pituduh Bendesa / Kelihan Banjar soang-soang manut dudonan sajawaning rikala ngwentenangg tengeran nganenin kapanca bhaya.
- (2) Sahanan kukul Banjar sawidangan Desa Pakraman Sidakarya puniki, patut nyarengin kasuarayang, prade wenten sinalih tunggil kukul Banjar / Desa nyihnayang wenten amuk / bhaya pati.
- (3) Sang nepak kukul tan sangkaning pituduh, patut digelis atur supeksa ring kelihan maka buatan panepakane kadi ring ajeng.
- (4) Suaran kukul sekaa-sekaa sakaluire ring Desa Pakraman Sidakarya tan wenang nyawerin suaran kukul desa miwah banjar.

Pawos 34

- (1) Suaran kukul tengeran pakaryan patut katedunin antuk ayahan manut daging dedaunan utawi siarane.
- (2) Suaran kukul tengeran bhaya patut katedunin antuk sahanan ayah lanang ngarep rauhin ayah truna saha gegawan pamitulung anut rupan bhayane.

Palet 5
INDIK PADRUWEN DESA

Pawos 35

- (1) Padruwen Desa Pakraman Sidakarya sane marupa Pura: Bale Agung, Pura Desa, Pura Mutering Jagat Dalem Sidakarya, Pura Dalem Sudha Sidakarya, Pura Kahyangan Sakti Sidakarya, miwah Pura Kahyangan Petasikan Suwung Kangin Sidakarya.
- (2) Bale Agung, Pura Desa, Pura Mutering Jagat Dalem Sidakarya, kaamong antuk samian banjar sawidangan Desa Pakraman Sidakarya.
- (3) Pura Dalem Sudha miwah Pura Kahyangan Sakti Sidakarya, kaamong antuk Banjar Dukuh Mertajati Sidakarya, Banjar Tengah Sidakarya, Banjar Sekar Kangin Sidakarya, Banjar Sari Sidakarya lan Banjar Graha Kerti salanturnyane.
- (4) Pura Dalem Petasikan miwah Pura Kahyangan Suwung Kangin Sidakarya, Kaamong antuk Banjar Suwung Kangin Sidakarya, Banjar Kerta Usada, Banjar Kerta Raharja, Banjar Kerta Petasikan lan Banjar Kerta Rahayu salanturnyane.
- (5) Barong Ket utawi palawatan Ida Ratu Ayu Mas Kendran, palawatan (tapel) Rangda Ida Ratu Gede (Manik Selem) Palawatan (tapel) Rangda Ida Rayu Ayu Manik Putih sane kadarmaputra ring Jagat Dalem Sudha, manut kadi palet 1, Pawos 51 (3) ring ajeng, taler kabawos tedung Jagat Dalem Sudha, palawatan topeng Sidakarya sane malinggih ring Pura Mutering Jagat Dalem Sidakarya, punika wantah kadruwe antuk Desa Pakraman Sidakarya.
- (6) Palawatan (tapel) Rangda Ida Ratu Ayu Manik Dadu, kawit druwen Banjar Dukuh Merta jati lan Palawatan (tapel) Rangda Ida Ratu Ayu Alit wit druwen Banjar Sekar Kangin Sidakarya rauh ring eteh-ete sajangkepnya manut pamutus pararem desane, punika sami sampun kasumuyugin ngranjing dados druwen Desa Pakraman Sidakarya.
- (7) Benjangan sinalih tunggil Krama Banjar tan dados ngugat malih.

- (8) Pura Bedugul utawi genah mamanan Tirta Ening rikala krama desane sinalih tunggil ngwentenang yadnya luire :
- ha. Pitra Yadnya (ngaben).
 - Na. Dewa Yadnya (nyekah, mamukur).
- Pamargin pamendake kawit nglintangin jalan dewata, Pura Desa, Pura Mutering Jagat Dalem Sidakarya, sasampunne pacang mawali (budal) pamargine nglintangin Banjar Dukuh Mertajati Sidakarya, salanturnyane raris nyujur genah kawentenan yadnya.
- (9) Pasambangan ring sawah Pasubakan Sidakarya kalaksanayang.
- (10) Olih-olihannyane wenang prajuru desane sane pacang mapaweh ring banjar-banjar sane ngwentenang pawangunan.

Pawos 36

- (1) Munjuk lungsur ring padruwen Desa sane marupa tanah palaba pura miwah tanah tiosan patut pastika kailikitayang.
- (2) Kawigunan tanah palaba pura miwah tanah tiosan kadabdaban antuk paruman Desa manut patitis Desane.

Pawos 37

- (1) Padruwen Desa Pakraman Sidakarya sane marupa setra luire :
- ha. Setra Sidakarya
 - na. Setra Suwung Kangin Sidakarya
- (2) Setra Sidakarya kaamong antuk Banjar Dukuh Mertajati Sidakarya, Banjar Tengah Sidakarya, Banjar Sekar Kangin Sidakarya, Banjar Sari Sidakarya, taler krama Banjar Suwung Kangin Sidakarya, sane sareng ngranjing / mapamaksan ka Pura Dalem Sudha Sidakarya.
- (3) Setra Suwung Kangin Sidakarya kaamong antuk Banjar Suwung Kangin Sidakarya.

- (4) Setra lianan ring sane ka-ungghang ring ajeng, wenten malih 3 (tiga), magenah ring kakuub wewidangan Desa Pakraman Sidakarya, luire :
- ha. Kuburan Bugis (kuburan Islam)
 - na. Setra Suwung Kelod / Suwung Batan Kendal, pangamongnyane ngranjing ma Desa Pakraman lan Desa Dinas Kelurahan Sesetan.
 - ca. Setra Wang Sakit Illa / Setra Pangaliklisan, magenah ring telengin wana prapat ring panepi siring kelod kangin Desa Sidakarya.

Palet 6

SUKERTA PAMITEGEP

Kaping 1

KARANG, WAWANGUNAN, LAN PAPAYONAN

Pawos 38

- (1) Sahanan karang paumahan patut :
- ha. Pastika wenten wates ipun
 - na. Mapamedal karurung utawi kamargine (tan wenten kabebeng).
- (2) Bendesa Pakraman patut ngutsahayang mangda karange kadi ring ajeng kawentenan ipun.

Pawos 39

- (1) Sahanan Krama patut ngwatesin karang-nyane soang-soang jantos sida trepti nyatur desa.
- (2) Wates karange sane majepitan, patut kategen olih kramane sane mahuluan kawates inucap.
- (3) Taru miwah olih-olihan sane maurip ring wates kadruwe olih Krama sane negen inucap.
- (4) Sahanan Krama manawi pacang ngwangun patut nganutin asta kosala kosali miwah asta bumi, sanistane patitis niskala.

Pawos 40

- (1) Tan wenang makta / ngenahang barang sane kaletuhin karang pumahan bilih-bilih manawi kaletahan nglantur sinanggeh nglimbakang (ngalikup) ngaletihin Desa manut Agama

Pawos 41

- (1) Tanem tuwuh, tetangunan sakaluire miwah tata ngangge karang tan wenang ngungkulin miwah ngawanang pocol utawi ngaletihin karang panyandingnya.
- (2) Prade wenten sapunika, wenang kasepat gantungin utawi katiwakin pamidanda manut pararem.
- (3) Tanem tuwuh, miwah tetangunan sane ngwetuang baya ring panyandingnya, panyepat gantunge wenang maren adepa agung ngajeroang saking wates.

Kaping 2

WAWALUNGAN

Pawos 42

- (1) Sahanan warga Desa sane miara sakeluir wawalungan patut sayaga nitenin negul utawi nglorogin mangda wawalungane punika tan wenten ngrusakin karang utawi abian anak tiosan, bilih-bilih mangda sampunang jantos ngranjing / ngaletuhin kahyangan.
- (2) Prade wenten wawalungan ngeleb saha ngaraningin pakarangan krama tiosan sang madruwe karang patut malungguhang ring sang nruwenang wawalungane. Wawalungan sane ngranayang rusak, kadulurin antuk nunasang bawos ring Kelihannyane, mangda katiwakang pamidanda agung alit manut parareman.
- (3) Rikalaning asasih jantos ping tiga sampun ngawehin pasadok, wawalungan inucap wenang kataban. Panaban punika patut uningang ring Kelihan Banjar.

- (4) Wawalungan tetaban inucap wenang katebus olih sang nruwenang, agung alit panebusan katiwakang antuk Kelihan Banjar, kadulurin danda manut karusakane sane kawetuang.
- (5) Rikalaning اساسih jantos ping tiga mataban kadi ring ajeng wawalungane wenang kaambil tan katebus. Pamargine naban punika malarapan antuk bebasan Kelihan Banjar.

Pawos 43

- (1) Prade wawalungane sane ngeleb ngranjing ka kahyangan, sang madruwe wenang kasisipan antuk danda prabiyaning upakara pamarisuddha sapatute.
- (2) Tata caraning malungguhang, naban miwah nebus pateh kadi mungguh ring ajeng.

Kaping 3

DUSTA LAN BHAYA

Pawos 44

- (1) Sahanan Warga Desa prade uning ring kawentenan jadma malaksana dusta patut digelis utawi pramangkin atur uning ring Prajuru.
- (2) Laksanane sane sinanggeh dusta miwah bhaya kocaping ajeng luire bacakan ipun:
 - ha. Jiwa bhaya.
 - na. Artha bhaya.
 - ca. Geni bhaya.
 - ra. Toyo bhaya.
 - ka. Plegandangan pamekas.
 - da. Dura-cara ring Agama
- (3) Bilih mabuat kawentenan ipun, sang uning inucap patut digelis nyuarayang kulkul banjar anut ring rupan panglaksanaan dustane.

Pawos 45

- (1) Sahanan warga-Desa prade uning ring kawentenan bhaya utawi panangkan bhaya patut pramangkin atur uning ring Prajuru.
- (2) Bilih mabuat kawentenan ipun, sang uning patut digelis nyuarayang kukul Banjar.
- (3) Bhaya utawi panangkan bhaya munggah ring ajeng, upamina: umah puun blabar lan sakancan punika.

Pawos 46

- (1) Warga Desa sane kaicalan / kapandangan, prade pacang maseserep, patut matur uning, lan nunas panuntun ring Prajuru Banjar inucap.
- (2) Prade genahe maseserep nglangkungin Banjar tiosan patut nunas-babebasan utawi uwak-uwakan ring Prajuru Banjar irika.
- (3) Kelihan inucap ngicening panuntun, mangda tata carane maseserep manut kadi dresta.

Pawos 47

- (1) Sahanan Warga Desa prade polih nemu barang sakeluire sawidangan Desa Pakraman Sidakarya, patut atur uning ring Prajuru Banjar.
- (2) Kelihan inucap nyiarang barang dadudukan punika, mangda sang madruwe sida mawantu ngamolihang barangnyane. Sang mari-angkenin patut nyidayang nerangang-ninasang, mungguing barang punika mula wantah padruwennya.
- (3) Prade jantos 3 (tigang) sasih tan wenten jadm sane ngelingin, wenang kadruwe antuk sang nuduk.

Kaping 4
PANYANGGRAN BANJAR

Pawos 48

- (1) Pakaryan druwen sinalih tunggil krama sane mabuat tata panyanggrannya kasuserah ring Banjar soang-soang.
- (2) Banjar wenang ngardi Awig-awig ngamanggehang tata carane nyanggra pakaryan kramane munggah ring ajeng.
- (3) Panyanggrane patut madarsana antuk arsa parama-tulung ring sang makarya, nanging tan sareng miteketing Krama ring Banjar miwah Desa.
- (4) Bilih karyane dahat bobot, Banjare wenang ngaruruh panampih ring banjar tiosan.
- (5) Pakaryan sane patut kasukserah ring panyanggran Banjare luire :
 - ha. Ngupakara sawa jantos pangabenan yadiastun tan pasawa.
 - na. Sahanan yadnya tiosan.
 - ca. Pakaryan tiosan manut Awig-awig Banjar, upami ngisidang sakaluir wawangunan / bale, jineng lan sakancan punika.

Pawos 49

- (1) Awig-awig Banjar ring ajeng, tan kengin kalaksanayang sadurung kaceciren antuk Bendesa pakraman.
- (2) Daging Awig-awig inucap patut tan maren ngadungang mungguing wibuh kincit pakaryane ring agung alit panyembrahmane ring Banjar.

Caturtas Sargah
SUKERTA TATA AGAMA

Palet 1
INDIK DEWA YADNYA

Pawos 50

- (1) Kahyangan-kahyangan sane wenten ring wewidangan Desa Pakraman Sidakarya, wenten 3 (tigang) soroh kawentenan ipun luire :
 - ha. Panyiwian desa (Kahyangan Tiga)
 - na. Panyiwian Jagat (kahyangan Jagat)
 - ca. Panyiwian pamaksan-pamaksan tiosan.

- (2) Rahina piodalan ring Pura sane sinanggeh panyiwian Desa luire :
 - ha. Pura Desa / Bale Agung / Mutering Jagat Dalem Sidakarya nemoning rahina Saniscara, Kliwon Wuku Landep (Tumpek Landep).
 - na. Pura Dalem Sudha Sidakarya nemoning rahina Anggara, Kliwon Wuku Medangsia (Anggara Kasih Medangsia).
 - ca. Pura Kahyangan Sakti Sidakarya nemoning rahina Buda, Kliwon Wuku Ugu (Buda Kliwon Ugu).
 - ra. Pura Dalem Petasikan Suwung Kangin Sidakarya, nemoning rahina Wraspati, Kliwon, Wuku Langkir.
 - ka. Pura Kahyangan Petasikan Suwung Kangin Sidakarya nemoning rahina Buda Wage Wuku Ukir (Buda Cemang Ukir).

- (3) Prajuru patut mastikayang indik piodalan miwah aci-aci Kahyangan Desane agung alit miwah tata panglaksananya.

Pawos 51

- (1) Prajuru patut mastikayang Pamangku-pamangkune sane kengin munggah tedun ring Palinggih-palinggih kahyangan Desane, miwah ngiasin Pralingganyane.
- (2) Sajabaning sang kapastikayang kadi ring ajeng, sapa sira ugi tan dados munggah ring palinggih-palinggih miwah ngambil pralingga Kahyangan Desane.
- (3) Taler patut kapastikayang indik sane wenang nyanggra tapakan-tapakan utawi ilen-ilen sane patut mingitin kasuciannya (Barong, Rangda, lan sakancan punika) sane ngranjing druwen desa miwah banjar.
- (4) Pamangku-pamangku kahyangan desane kasangaskara / kawintenin antuk sapunika taler upakara pitra yadnyane ring sedanya kapungkur.
- (5) Prajuru tan maren nureksa nitenin mangda I Pamangku satata pageh nganutin sasanannya, dumugi rajeg kaheningannya, saha kapastikayang olih-olihannyane.

Pawos 52

- (1) Prajuru nuntun mangda sahanan upakara Desa Pakraman sida kamanggehang sakasidhan, agung-alit anuting ring kawentenannya upami: Ngusaba-Desa, Ngusaba Nini lan sakancan punika.
- (2) Prade wenten cihna kadurmanggalan jagat, Prajurune digelis ngutsahayang pamarisudhan nunasang ring sang Sadaka / sulinggih.

Pawos 53

- (1) Prajuru patut nuntun krama desa ngamanggehang kasucian kahyangan desane.
- (2) Bacakan letuh cendalane sane tan dados ngranjing ring Kahyangan Desane luire :
 - ha. Jadma Luh sebel-kandel sakaluire (ngrajaswala, madruwe oka, karuron), manut sengker.
 - na. Jadma cuntaka sangkaning kapademang.

- ca. Sahanan jadma patika (panak babinjat, wang beling / kasanggaman tan sinangaskara, wang mamitra ngalang, wang Sakit ila, jadma buduh miwah candala-candala tiosan), sadurung kalukat kaprayascita manut Agama.
 - ra. Jadma kapastikayang panten antuk Prajuru.
 - ka. Jadma tan mabusana tegap (wastra, kakampuhan nyerapah, lan maumpal, madestar rikala muspa utawi wastra kalih slempot rikala ngayah).
 - da. Sato agung ngawit bawi ngagengan, sajawaning kala mapepada.
 - ta. Sahanan barang sane sinanggeh leteh manut agama (Tulang / getih / bok / sakaluire wiwitan watang, layudan pitra yadnya lan sakancan punika).
 - sa. Miwah sahanan candala tiosan.
- (3) Prati laksana (sahanan laksana sane ngletuhin) tan wenang ring Pura upami :
- ha. Marebat utawi bawos bangras ngwetuang iyeg, bilih-bilih jantos kanin metu rah, mamisuh, masanggama, makolem dados asiki sang truna kalawan daha, mawarih, mabacin, lan sakancan punika.
 - na. Mungguh tedun tan patuduh Prajuru
 - ca. Miwah prawertine ala tiosan.

Pawos 54

- (1) Kramane sane mamanggih mungguing wenten jadma ngaletuhin Kahyangan utawi pracihna kadurmanggalaning jagat kadi mungguh ring ajeng patut atur uning Prajuru.
- (2) Prade tan wenten nyadokang, wenang kasisipang sinanggeh saruron ring corah.

Pawos 55

- (1) Kahyangan panyiwian pamaksan-pamaksan tiosan, tata cara ngastitiang kasuciannya patut saeloan ring Kahyangan-Kahyangan Desane, sajawaning sane karirihan madruwe dresta tiosan.
- (2) Yan tan manut kadi munggah ring ajeng, pralingga kahyangan inucap: tan dados kasarengang rikala nyejer ring bale agung kalaning / rerahinan Pangesangan, Pangusaban miwah upakara-upakara tiosan.

Palet 2

INDIK RSI YADNYA (KAWIKON / GURU LOKA)

Pawos 56

- (1) Sang pacang mapudgala / madwijati, sajawaning nunas panugrahan ring sang rumawos (Parisada utawi Pamerintah) taler patut masadok ring Kelihan Banjar miwah Bendesa Pakraman.
- (2) Prajuru-prajuru Desa inucap patut sareng nureksa nitenin, mangda sulur kalih pamargine jati-jati manut ring kecaping agama, sane patut katureksa pinih ajeng kaceda angga miwah kasucian sang pacang madwijati punika.
- (3) Prade wenten sinanggeh kantung samar, prajuru inucap patut atur uning ring sang rumawos, mangda panugrahan sang rumawos sidha jati-jati manut ring kakecap agama.
- (4) Prajuru Desane inucap taler patut sareng nyaksinin pamargin upakarane.
- (5) Sapupute, Prajuru Desane patut digelis ngutsahayang mangda parab sang diniksan ring sahanan ilikita kagentos antuk biseka kawikon manut panugrahan nabanya, saha nyiarang ring paruman Banjar miwah paruman Desa.
- (6) Upakara nglinggihang pujane kapungkur taler patut kasaksinin, saha kasiarang sapatutnya ring paruman Banjar miwah Desane.

Pawos 57

- (1) Prajuru patut nuntun saha ngenterang, Krama Desane nitenin sapa margin para wikune ring wewidangannya, indik mikukuhin kasucian linggih Ida.
- (2) Prajuru / pamekas Bendesa Pakraman, patut digelis atur uning ring Nabanya, prade wenten kacihnan wiku sasar ring laksana.
- (3) Atur piuning ring ajeng patut kadulurin cihna anut tri pramana (bukti, ilikita, saksi).
- (4) Daging pamutus bawos sane katiwakang antuk Nabanya digelis kasiarang ring paruman banjar miwah desane.
- (5) Prade pamutus tatiwake ring ajeng kamanah / kapikayun durung sida tinasapadang Prajurune atur supeksa ring sang rumawos (Parisada / Pamerintah).
- (6) Pamutus tatiwak Nabe sane sampun kasanggra antuk sang rumawos inucap sinanggeh pamutus pastika tan kawicaran malih.
- (7) Prajuru-prajuru tan wenang lumaksana matetiwak ring sang maraga wiku.

Pawos 58

- (1) Sang pacang mawinten / pudgala maka buatan pacang mamargi ngamangkunin, nyonteng, kabayan, dalang sakaluire pacang ngenterang yadnya, patut masadok ring Kelihan kawicaran miwah Bendesa Pakraman.
- (2) Prajuru-prajuru inucap patut ngawas nitenin mangda pamargine manut ring kakecap utawi drestane.
- (3) Prajuru Desane wenang nawang-ngalangin, prade kacihnan sasar kakecap utawi drestane.
- (4) Sang tan terima ring tatiwak Prajuru inucap, dados nunas pamatut ring sang Rumawos (Parisada / Pamerintah)

- (5) Pamutus bawos sane katiwakang antuk Rumawos ring ajeng sinanggeh pamutus pastika, tan kawicaranan.
- (6) Prajuru-prajuru Desane patut sareng nyaksinin upakara sang mawinten, sapatute, patut digelis kasiarang ring paruman Banjar miwah Desa, tegep rauhing wates kawenangan pangenter yadnya sane dados kamargiang manut panugrahan sang guru / drestanya soang-soang.

Pawos 59

- (1) Krama Desane sami patut sareng ngawas nitenin katuntun olih Prajurune, mangda sahanan yadnya sane kawentenan kaicen pamuput olih Pandita utawi sang sajana (pamangu sakaluire), manut dudonan kadi kawenangannya soang-soang manut dresta.
- (2) Prade wenten nglempasin, bilih-bilih sane pastika nyumuka, prajurune wenang ngalangin utawi ngurungang yadnya inucap, (tetep kalaksanayang, yadnya saha phalawasannya sane kalaksanayang sinanggeh tan sah).
- (3) Sang nglempasin utawi dustannyane patut katiwakin pamidanda olih Prajuru agung alit manut parareman.
- (4) Prade sang katiwakin tan tinut ring pamutus prajuru, wenang nunas bawos ring sang Rumawos (Parisada / Pamerintah), sane patut ngicenin pamutus.

Palet 3

INDIK PITRA YADNYA

Pawos 60

- (1) Sang pacang ngangge tunon / setra, patut nunas bebebaskan ring Bendesa Pakraman, saha tatane ngangge manut kadi dresta miwah pituduh Prajuru inucap, nenten pisan kalugra mendem utawi nunjel sawa / awak-awakan sawa ring karang paumahan.
- (2) Krama Desane sami patut nitenin, mangda sahananing letuh setrane tan wenten nglahlah / kabakta ka Desa Pakraman, bilih-bilih ka Kahyangan-Kahyangan.

- (3) Prade sawane sane pacang katunjel utawi katanem ring setra boya sawan krama desa, patut nawur apananjung batu / panukun setra agung alit manut pararem.
- (4) Prade wenten jadmia istri lampus ngadut manik (belingan), tan wenang pendem / geseng sadurung bobotane embas.
- (5) Prade lampus sangkaning ulah pati, salah pati, kapangawan tiba, senggot banteng, nuwek sarira lan sakancan punika, kengin kabakta budal, risampune kamanggala antuk upakara banten pangulapan ring genahnya lampus.
 - ha. Ulah pati, salah pati tan kapatutang ngamargiang Sawa Prateka (ngaben), wantah dados kapendem, Masengker 3 (tigang) warsa yan salah pati, 5 (limang) warsa yan ulah pati, wawu kadadosang kamargiang upacara pitra yadnya sapatutne (kaabenang).
 - na. Prade wenten rare lampus sadurungne maketus nenten kadadosan kaineapan wenang kapendem, nenten malih nganggen padewasan lan pamargi tiosan indik galah mendem manut kadi pamutus jero Bendesa.
- (6) Tan kalugra nunjel utawi nanem sawan wong tan magama Hindu ring setra Desa Pakraman Sidakarya.

Pawos 61

- (1) Krama Desa pacang atiwa-tiwa, patut nunas kabebasan ring Bendesa Pakraman.
- (2) Prajuru inucap nitenin tur nuntun mangda yadnya punika tinas, tan nyantulin kasukertan Desa, Pamekas tan wenten nyepungin kasucian Desa utawi Kahyangan.
- (3) Pakaryan atiwa-tiwa ngupakara sawa patut kapaserah ring Banjar.
- (4) Banjare sukerta nyanggra, utawi ngwehin bebebaskan manut awig-awig Banjar.
- (5) Pamargine ngenter sawa mangda dabdab tur alon.
- (6) Pamargine ngenter sawa terus pacang kaabenang tan kalugra magujeg-gujegan wiadin tan dados ngarap.
- (7) Rahina pakiriman sawane kapendem, para istri soang-soang banjar mangda sareng ngarombo saha abusana sanistane nyelempot utawi masenteng istrine.

- (8) Pakiriman saji rikala sawane kaaben, jantos puput pangutangan / nganyut mangda Krama Banjar lanang / istri anut kadi ring ajeng.
- (9) Krama Desane sane pacang makarya ngaben manut pamargine kadi dresta, mangda kawentenan punia panukun tirta, kaatur ring Pamangku-Pamangku Pura Kahyangan Tiga ring Desa Pakraman Sidakarya luire :
- ha. Kelapa dasa bungkul
 - na. Adeng (taluh) dasa bungkul
 - ca. Beras dasa cengkilik
 - ra. Jinah sasari Rp. 50.000,- (seket tali rupiah).
- (10) Ageng pawilangan punia sane katur kadi ring ajeng, winilang / wilangin antuk jinah tan dados lintangan ring satus seket tali rupiah (Rp. 150.000).

Pawos 62

- (1) Pamendeman miwah panunjelan sawa tan kawenangan nemoning : Prawani, purnama, tilem, Anggara Kliwon, Buda Kliwon, Buda Wage, Saniscara Kliwon, Kajeng Kliwon, Saniscara Umanis, Tawur Kasanga, Nyepi, tur puja wali ring Kahyangan Desa; taler tan kalugra:
- ha. Makirim wangke
 - na. Nglangkar watang
 - ca. Nginepang bangbang
- (2) Prade wenten sane murug patut katiwakin pamidanda agung alit manut pamutus pararem Desane.
- (3) Kala gotongan, nuju dina urip 14 (empat belas), ring sukra kliwon, Saniscara Umanis, Redite Paing, kawastanin kala gotongan. Nuju dina Sukra Pon, Saniscara Wage, Redite kliwon, kawastanin semut sadulur, taler tan kalugra mendem sawa lami pawilangan 3 (tigang) dina mangda nginep.

- (4) Prade wenten sane murug patut katiwakin pamidanda agung alit manut pamutus Pararem Desane.
- (5) Ngawit ring wuku Dungulan wenten Krama sane seda / padem, mangda ring wengi kadadosan mendem, sakewanten tan anabuh / nyuarayang kulkul, mangda nyilib pamargine.
- (6) Kacuntakan / sebelan Banjar utawi Desa inggih punika ;
 - ha. Kacuntakan sawa sane kaabenan ngawit saking ngrancang / panyusunan jantos 3 (tigang) rahina sasampun pangutangan, kadulurin antuk prayascita durmanggala.
 - na. Kacuntakan pangabenan nglanus tandang mantri wiadin tumandang mantri ngawit saking ngrancang / panyusunan jantos pangutangan kadulurin antuk prayascita durmanggala.
- (7) Kacuntakan / sebelan sang madruwe layon sanistane 7 (pitung) rahina, salamin ipun 12 (roras) rahina.
- (8) Sahananing Priyangan Kahyangan Tiga nenten kakenenin kacuntakan tur nenten kapatutang malih ngaryaning upakara pakeludan.

Palet 4

INDIK MANUSA YADNYA

Pawos 63

- (1) Manusa yadnya inggih punika upakara-upakara dharmaning manusia ngawit saking patemoning kama petak kalawan kama bang sajeroning garba (waduk / weteng) ibyang ngantos lampus riwekas.
- (2) Upakara kadi ring ajeng madudonan kadi ring sor :
 - ha. Magedong-gedongan duk pangrempinin ibyang (yusa bobotan 3-4 sasih).
 - na. Duk sang kama-reka (rare) wawu embas / medal.
 - ca. Kepus odel (puser).
 - ra. Ngalepas haon (risampune rare mayusa 12 rahina).
 - ka. Akambuhan (42 rahina).
 - da. Tigang sasih (nyambutin).
 - ta. Pawetuan ri sampun 6 (enam) sasih.

- sa. Ngempugin rikala wawu tumbuh untu.
 - wa. Makupak / maketus upakara sasayut pangarti suara.
 - la. Mungguh daha truna (ngaraja wadone, ngembakin lanange).
 - ma. Mapandes / matatah.
 - ga. Mawiwaha / madengen-dengen ring pagrihastane.
 - ba. Mawinten, nunas panugrahan Sang Hyang Aji Saraswati.
- (3) Upacara-upacara soang-soang ring ajeng nista, madia, utama, nganutin sastra-agama miwah dresta maka buatan Desa drestane ngawinang sima cara pabanjaran ring Desa Pakraman Sidakarya.

Palet 5

INDIK BHUTA YADNYA

(KASUCIAN – DESA)

Pawos 64

- (1) Prajuru nuntun i krama nglaksanayang upakara pacaruan ring soang-soang paumahan nemoning Tilem sasih ka nem, muwah Kajeng Kliwon uwudan (Wuku Pujut).
- (2) Taler upakara caru tawur kasanga mangda kalaksanayang ring Desa, Banjar, miwah ring soang-soang pumahan nemoning Tilem Kasanga.
- (3) Upakara pacaruan inucap ring ajeng kalaksanayang agung alit anutin ring kawentenne.

Pawos 65

- (1) Prajuru nuntun tur nabdabang mangda desane prasida trepti tur sipeng ring Nyepi, tur brataning panyepian mangda karajegan.
- (2) Brataning panyepian inucap ring ajeng luire :
 - ha. Amati geni
 - na. Amati karya

ca. Amati lelanguan

ra. Amati lelungan

- (3) Sajabaning wenten pari indik tiosan (sakit, madruwe oka alit lan sakancan punika), sahanan warga Desa patut saturut ninutin brataning panyepian inucap ring ajeng.
- (4) Ritatkala Desa Nyepi, wenang sareng sami amati geni, saking semeng rauh benjangan. Yan wenten sane mamurug wenang kadanda ring desane agengnyane manut pamutus parareman Desane.
- (5) Rikala Desa Nyepi, yan wenten sinalih tunggil Krama matepetan sakit berat, madruwe watangan kari jumah, miwah madruwe rare durung aweton, tan patut kakenin danda pamurug pamati geni punika, reh manut terap kadi saban.
- (6) Rikala Desa Nyepi, tan kalugra ngamargiang gedebeg, anunggang dokar, sepeda, sepeda motor, motor, miwah kuda, yan wenten sane mamurug, wenang kadanda manut pamutus pararem desane.
- (7) Rikala Desane Nyepi, tan wenang amikul wiadin anyuwun saka luire. Yan wenten sane mamurug wenang kadanda agung alit manut pamutus pararem desane.
- (8) Rikala Desane Nyepi tan wenang ngwentenang palian (judian). Yan wenten sane mamurug patut kadanda agung alit manut pamutus pararem desane.
- (9) Rikala Desane Nyepi, tan wenang angadak-aken sabda ghora minakadinia mamed-medan. Yan wenten sane mamurug wenang kadanda agung alitnyane manut pamutus pararem desane.
- (10) Rikala Desane Nyepi tan wenang mamunyah tur ngamedalang sabda purusya sane makrana patukar. Yan wenten amurug wenang kadanda agung alitnyane manut pamutus pararem desane.
- (11) Rikala Desane Nyepi tan wenang anabuh kulkul, wiadin gambelan. Yan wenten amurug wenang kadanda agung alit manut pamutus pararem desane. Nanging yan prade wenten kageni-bhaya (kapuwunan), wiadin wenten amuk rikalaning panyepian, wenang anabuh kulkul, tan wenten pamidandane.

- (12) Rikala Desane Nyepi, tan wenang anambut karya saluire, ring sawah wiadin tegal, yan wenten amurug wenang ya kadanda agung alit manut pamutus pararem desane.
- (13) Rikala Desane Nyepi tan wenang ngangon, wiadin nglumbar kebo, sampi, kambing, itik miwah sane tiosan sakancan punika, ring sawah wiadin tegal, ring margi, wiadin ring setra. Yan wenten amurug wenang kadanda agung alit manut pamutus pararem desane.
- (14) Ritatkala Desane Nyepi, yan wenten sinalih tunggil Krama ngwentenang upakara yadnya luire: mabulan pitung dina rare, ngotonin rare, nyumunin tedun ka tanah, ngodalin ring Parhyangan, Pamrajan, sanggah, Paibon, Panti, wenang ageni-geni tur mangda sasidan-sidannyane mangda kamargiang sasemeng-semengannyane tur nenten kapatutan matetangguran lan tiosan, tan wenang keni pamidanda
- (15) Prajuru Desa, miwah Hansip lan sakancan punika sane ngamargiang tugas mangdane sidha trepti mamargi panyepianne, kadadosan ngangge / nglinggihin luire :
- Sepeda, tan wenang keni danda, tiosan ring punika, yan wenten sane amurug, wenang keni pamidanda pamurug “Panyepian”
- (16) Riwus rahina Nyepi kawastanin Ngembak Geni, mapiteges nglukar yoga samadi kadulurin antuk ngwentenang pangaksama soang-soang Krama Banjar / Desa Sidakarya, maka cihna pangawit Içaka Warsa Anyar.

Pawos 66

PECALANG DESA

- (1) Sane wenang nyatur pariksa miwah nangkep, yan wenten sane mamurug tata cara desa rikalaning desane Nyepi, wenang I Pecalang Desa sinalih tunggil.
- (2) Kueh Pecalang Desa punika sane kamedalang soang-soang Banjar :
- | | | |
|-----|----------------------------------|----------|
| ha. | Banjar Dukuh Mertajati Sidakarya | : 9 diri |
| na. | Banjar Tengah Sidakarya | : 8 diri |
| ca. | Banjar Sekar Kangin Sidakarya | : 9 diri |

- ra. Banjar Suwung Kangin Sidakarya : 4 diri
 - ka. Banjar Sari Sidakarya : 3 diri
- (3) Pangageng pecalang desa kuehnyane wenten 33 diri, inggih punika para Kelihan-Kelihan, wiadin Prajuru Desa sane katuju antuk para kelihan-kelihan.
 - (4) Pecalang Desa miwah pangagengnya, rikala panyepian Desane wenang ya abusana, awastra, asabuk, akampuh poleng, asabuk jabaning kampuh, adestar selem, anungkelit keris, tur asekar waribang (pucuk barak) ring karna kiwa (kuping kebot).

Pawos 67

- (1) I Prajuru tan maren nuntun i krama mangda kasucian Desane sida ajeg.
- (2) Sane patut katitenin sahanan pamargine nyapa krama sane sinanggeh duskreta miwah ngaletihin Desa upami:
 - ha. Salah timpal (jadma masanggama ring wawalungan).
 - na. Gamia gamana sane katelanjur.
 - ca. Panguman-nguman ring sabha.
 - ra. Miwah sahanan sane sinanggeh ngaletihin manut linggih agama.
- (3) Sang kacihnan malaksana kadi ring ajeng, patut kasisipang mamarisudha Desa sapatutnya.

Pancamas Sargah

SUKERTA TATA PAWONGAN

Palet 1

INDIK PAWIWAHAN

Pawos 68

- (1) Pamargin pawiwahan sane kapatutang ring Desa Pakraman Sidakarya inggih punika patemoning purusa lan predana malarapan patunggalan kayun sukacita madulurin upasaksi sekala kalawan niskala wenten 3 soroh, luire :
 - ha. Papadikan, kamanggalan antuk pakrunan.

- na. Marangkat, ngarorod riin wawu kakurenayang.
 - ca. Nyeburin utawi nyentana risampun kategepin / kaeteh-etehin (upacara).
- (2) Pidabdab sang pacang mawiwaha patut :
- ha. Saking pada rena.
 - na. Prade pangambile matiosan Agama, kamanggala antuk banten panyambutan utawi kawisudayang riin.
 - ca. Asapunika taler prade pangambile asu mundung alangkahi karang ulu kasukserah ring Ida manggalaning yadnya, sakewanten tan ngirangin pamargine sane kapatutan ring sang Guru Wisesa.

Pawos 69

- (1) Sinalih tunggil krama pacang ngawarangan kulawargannya patut masadok ring Bendesa Pakraman miwah Kelihan Banjarnya sanistane 3 (tigang rahina), sabanen dewasa pawarangane.
- (2) Prajuru-prajuru inucap patut maritetesin pawarang punika, prade sampun manut ring drestaning pawarangan, kaicen pasayuban sapatutnya.
- (3) Prade tan manut, Prajuru-Prajuru ngutsahayang ngicen panuntun larapan pamargine sida manut tata cara.
- (4) Yan pawarangan inucap lempas ring kakecap Agama (upami gamia gamana) utawi padewasan, wiadin masenengan pada lanang wiadin pada istri, sane sinanggeh ngawinang terak jagat, Prajuru-prajuru punika patut ngurungang pawarangane tur malasang lanang wadon inucap saha kakeniang pamidanda manut pararem Desane.
- (5) Tata sulur pawarangan inucap mangda taler nganutin Undang-Undang No.1 warsa 1974 saha P.P. No. 9 warsa 1975 miwah pasuruan Gubernur Bali.

Pawos 70

- (1) Prade panureksan ring ajeng nyihnayang pawarangane sampun manut ring drestane, upakaranya dados kalanturang.
- (2) Ring panemayan upakara widhi-widanannya, Prajuru inucap patut nodya maka saksi utama kasarengan antuk kelihan dinas (kapala dusun).
- (3) Prajuru-prajuru saksi punika patut nitenin antuk Ilikita indik sulur pamargin pawaranganne, bilih-bilih yaning wenten indik sane mabuat, upami bebaktan tetatadan, jiwadana sang pradana, sulur purusa pradana lan sakancan punika.
- (4) Kelihan Banjare digelis nyuratang pawarangan inucap ring ilikitannya nyiarang ring paruman Banjar kapungkur.

Pawos 71

- (1) Sinalih tunggil Krama yan wenten kaluargannyane istri / lanang kawarangan sangkaning kalilayang (ngrorod / ngrangkat, kapadik / kapinang utawi kajangkepan), maletan aselid patut masadok ring Kelihan Banjarnya.
- (2) I kelihan nyuarayang kukul tulud kalih, (2), tabuh telu (3).

Pawos 72

- (1) Kramane sane nampi wang ngrorod, patut pramangkin masadok ring Kelihan banjarnya.
- (2) I kelihan patut digelis nureksa tur netes sang ngrorod, maka buatan maritiaksayang manut utawi singsal pamargine ring drestane.
- (3) Bilih pamargine sampun ngenanin indik / nepek ring dresta, sang ngrorod miwah sane nampi polih pamikukuh pasayuban Banjar minakadi Kelihan / Prajuru-prajurune.
- (4) Prade pamargine tan manut ring dresta, I Kelihan patut digelis malasang, sang kinira-kira katetehan kawehin pasayuban ring genah paumahan kelihane.

- (5) I kelihan digelis patut ngutsahayang mitahu wirang sang katetehan punika, prade linggihnyane doh, dura desa / dura kecamatan, usahane katur ring sang rumawos (perbekel / camat) manut dudonan.
- (6) Sang mamiseka, sasampune kaparitetes wasta kalih umahnyane katundung saking wewidangan Banjar inucap.
- (7) Krama sane nampi patut katureksa, manut ring prakartinnyane, yan saruron (sion) ring corah nyarengin misekayang, wenang danda agung alit manut pamutus Kelihan tapakang ring parareman.

Pawos 73

- (1) Sang maseserep sane pacang netes pangrorodan, patut masadok tur nunas panuntun ring Kelihan Banjar, I Kelihan patut nureksa netesang sang sane nreteg / maseserepan punika, jati tan jatannya patut pernah wirang sang ngorod ngrangkat.
- (2) Yan linggihnyane jati-jati pernah wirang, I Kelihan patut digelis nganter seserep punika kaumah / genah sang ngorod.
- (3) Sang maseserep patut tinut ring sapituduh Kelihan indik ngenanin tata netes pangrorod luire:
 - ha. Ngranjing ka umah / genah inucap tan dados lintang ring 2 (kalih) diri.
 - na. Tan kengin makta sanjata, gegawan sakaluire.
 - ca. Tan kengin matingkah kalih mabawos purusa nantang-nantang.
- (4) Sanapake, I Kelihan patut midabdabin mangda tata cara panetesane trepti, maka buatan mangda anake istri sane ngrangkat / ngorod jati-jati polih nerangan idepnyane sabebas ipun. Taler wirang seserep mangda polih sareng-sareng mireng / miragiang ucapan anake istri punika, luire pidabdabe:
 - ha. Anake istri kagenahang nragga, tan dados anak tios ngenampekin prade kirang ring 3 (tigang) depa tur tinas ring inange.
 - na. I Kelihan nuntun nulurang, mangda sang maseserep polih mataken ring sang istri punika.

- ca. Kelihan nyuma – kutayang ring sang istri, mungguing dane pacang ngicenin pasayuban manut ring daging idep sang istri.
 - da. Yan pada arsa pangrorodane sang maseserep pacang katulak, yan sangkaning papaksan, sang lanang pacang katiwakin pamidanda sapatutnya.
 - ka. Pamupute I Kelihan dumogi malaksana anut ring pamutus idep anake istri inucap.
- (5) Prade anak istri weddan Desa Pakraman Sidakarya ngrorod / ngrangkat ka dura Desa wiadin dura kecamatan, sang sane ngambil mangda nglaksanayang manut pamargine luire :
- ha. Sang mapejati / panglukuan manut dresta mangda kamargiang sasampun engseb surya.
 - na. Saha makta sundar boya lampu senter maka cihna.
 - ca. Pinih riin wenten atur kalih sadok ring Kelihan Banjar wiadin Kepala Dusun / Kepala Lingkungan, salanturnyane raris nuntun sang a rauh.
 - ra. Mangda makta ilikita pastika indik rangkate lanang istri sane kalingga tanganin antuk perbekel muah camat wiwitan Desa sang sane ngambil.
 - ka. Sang mapejati / ngluku patut tinut kadi pawos 73 (3). 1.2.3 ring ajeng.

Palet 2

INDIK PALAS MARABIAN

Pawos 74

- (1) Sang palas marabian patut masadok ring Kelihan Banjarnya.
- (2) Pasadok ring ajeng kaduluran antuk katerangan pastika nganenin sapariindik palasnyane, upami indik pah-pahan guna kaya, tataning ngupadi okanya bobotan kalih sakaluiring pamutus iketan alaki rabi.
- (3) Palas marabian sane patut kasadokang inucap ring ajeng, inggih punika palase sane pastika sampun puput bawos, yadiastun sangkaning sami-sami lila legawa, utawi sangkaning pamutusing pawicaran.

- (4) Prade sane kasadokang durung marupa kapalasan sane pastika puput, Kelihan Banjar patut ngicenin panuntun mangda sulur / bawos palase kabawosin / kapatutang riin.
- (5) Palas parabiane sami patut kadulurin antuk upakara saha widi wedana masamsam ring Pura Desa / Bale Agung, manut ring kakecap aji Agama.
- (6) Kelihan Banjare ngunggahang ring pangilikita saha nyiarang ring paruman kapalasang punika.
- (7) Pamargine ring ajeng prasida kamargiang risampun madasar ilikita patra (vonis) saking pangadilan.

Palet 3

INDIK SANTANA

Pawos 75

- (1) Yan wenten krama madruwe putra, masengker 3 (tigang) rahina saking embasnyane patut masadok ring Kelihan Banjarnyane.
- (2) I kelihan ngunggahang sane embas punika ring ilikita banjar saha nyuarayang kulkul tabuh 3 (telu) telung tulud.
- (3) Krama madruwe putra inucap nunasang ring sang ngawenang mangda prasida polih ilikita putra sajati (akte kelahiran).

Pawos 76

- (1) Sinalih tunggil krama yan pacang ngidih pianak / santana, patut masadok ring Kelihan Banjarnya, sanistane, asasih (35 rahina) sabanen dewasa pamerasan.
- (2) Kelihan inucap patut nyiarang ring Banjar, saha ngaturang ring Bendesa pakraman mangda kasiarang ring wewidangan Desane.
- (3) Sang rumasa kababatan ring pamerasan punika, sanistane masengker awuku sabanen dewasa pamerasan, patut nunas bawos ring Bendesa Pakraman.
- (4) Bendesa Pakraman digelis mawosin saha ngicenin pamutus bawos tepekang ring sastra miwah drestane tiosan.

Pawos 77

- (1) Yaning sulur tata pamerane sampun manut, Kelihan Banjar ngicen pasayuban, larapan upakara widhi widana sidha kalaksanayang.
- (2) Ring panumaya upakara, Kelihan Banjar miwah Bendesa Pakramane patut nodya sinanggeh saksi utama.
- (3) Sawusan upakara, Kelihan Banjare digelis nyuratang pameran inucap ring ajeng ring ilikitannya, miwah nyiarang ring sangkepan kapungkur.
- (4) Kala nyaksinin upakarane, pamekas kala ngunggahang ring ilikita, patut pastika wenten utawi tan wentene brana sakaluire sane sinang “pameran”.
- (5) Krama sane meras patut nunasang ring sang ngawe wenang mangda prasida polih ilikita putra (akte pameran).

Pawos 78

- (1) Prade sulur pamerane tan manut ring drestane Kelihan Banjare patut ngandeg sang pacang makarya saha ngicenin tuntunan mangda kaputusan riin babawos, sulur utawi wicaranya.
- (2) Panglaksanane kapungkur anut ring pamutus inucap.

Palet 4

INDIK WARISAN

Pawos 79

- (1) Warisan inggih punika tetamian artha brana, ayah-ayahan, miwah utang-piutang saking kaluhuran arep ring turunannya.
- (2) Sane pastika sinanggeh warise luire :
 - ha. Pura, Dadya, Panti, Paibon, Pamrajan, lan sakancan punika saha palaba-palabanya (due tengah).
 - na. Paguna kayan, tatadahan, jiwa dana lan sakancan punika.
 - ca. Utang piutang, saha sakaluir ayah ayahan miwah tetegenan.
- (3) Pangwarisan ring Desa Pakraman Sidakarya nganutin pancer kapurusa.

Pawos 80

- (1) Sang pastika wenang tur patut ngwarisin (ahli waris) luire :
 - ha. Prati santana purusa.
 - na. Santana rajeg.
 - ca. Santana paperasan lanang / wadon
- (2) Prade tan wenten ahli waris kadi kecape ring ajeng, sane patut ngwarisin inggih punika :
 - ha. Turunan purusa pernah ngunggahang, luire : rerama, rerama misan, rerama mindon.
 - na. Turunan purusa pernah kasamping, luire : kaponakan, kaponakan misan, kaponakan mindon.
- (3) Santana sane metu boya sangkaning pawiwahan sane sinanggeh sah, ngwaris saking ibyang kemaon.
- (4) Swadarmaning ahli waris :
 - ha. Manerima saha ngutsahayang tetamian pahan saking leluhurannya.
 - na. Malihara sanggah, Paibon, Dadya, Panti, Pura, lan sakancan punika tur nglaksanain upacaranya.
 - ca. Nyelidihin ayah-ayahan pawaris.
 - ra. Ngabenan pawaris saha nglanturang upacara ring pitra.
 - ka. Naurin utang-utang pawaris.
 - da. Miwah sane tiosan manut dresta.

Pawos 81

- (1) Pangepahan warisan artha brana patut kalaksanayang sasampun :
 - ha. Kalaksanayang upacara pitra yadnya pawaris.
 - na. utang-utang pawaris buntas katawur.

- (2) Yaning ring sajeroning kulawarga wenten ahli waris langkungan ring adiri patut:
- ha. Kawentenan piagem indik pangepahan warisan inucap.
 - na. Yaning tan kamolihang paingkup, bawos ring piagem inucap, patut katunasang tatimbangan ring Kerta Desa.
 - ca. Yaning taler tan kamolihang paingkup bawos patut parindikan punika kasukserahang ring sang rumawos (pangadilan negeri).
- (3) Sinalih tunggil sang patut ngwarisan prasidha tan polih pahan prade :
- ha. Matilar / magentos saking Agama Hindu.
 - na. Alpaka Guru Rupaka
 - ca. Tan tinut ring swadharmaning ahli waris
 - ra. Santana rajeg miwah santana nyeburin ninggal kadaton.
- (4) Sang tan patut ngwaris nanging wenang muponin warisan kaluhurannya luire :
- ha. Santana luh sane durung kasah mawiwaha.
 - na. Balu luh wiadin balu muani nyeburin.
 - ca. Sang mulih daha utawi truna.

Pawos 82

Pawaris rikala maurip, kengin mapaweweh :

- ha. Jiwa dana miwah tetatadan / bekel arep ring pianak sane kasah mawiwaha.
- na. Padum pa-among miwah pamupon hasil warisan arep ring ahli waris.

Pawos 83

- (1) Prade wenten warisan kaputungan, sang Prajuru Desa wenang mawosin (nureksa sila-sila / sulur pakaluargan) tur nibakang ring ahli waris purusa.
- (2) Yan tan wenten ahli waris kadi kecape ring ajeng (1), kengin katibakang ring wadone.
- (3) Prade taler tan wenten kadi kecape ring ajeng (2), katibakang sakama-kama sakewanten mangda patunggalan Desa Pakraman Sidakarya, tur magama Hindu.

Sad Sargah
WICARA LAN PAMIDANDA

Palet 1
INDIK WICARA

Pawos 84

- (1) Sane wenang mawosin / mutusang wicara ring desa luire :
 - ha. Kelihan Banjar, prade sang mawicara sami-sami patunggalan babanjaran.
 - na. Bendesa Pakraman, prade sang mawicara matiosan babanjarannya.
 - ca. Sane wenang mawosang / mutusang wicara majeng ring prajuru inggih punika: Sabha Desa
- (2) Prade sang mawicara tan wenten cumpu ring Kelihan Banjar, wenang nunas bawos babandingan ring Bendesa Pakraman.
- (3) Pamutus Bendesa Pakraman arep ring wicara inucap ring ajeng (2) sinanggeh wesananing bebawosan ring Desa, yening durung pastika raris kabawosang ring samuan agung.

Pawos 85

- (1) Sahanan wicara sane mawiwit kacorahan sakaluire, miwah sinanggeh nungkasin daging awig-awig, pasuara miwah pararem Desa utawi Banjar, patut raris kabawos tan nyantosin pasadok.
- (2) Sajaba wicara kadi ring ajeng, patut nyantosin pasadok sang nunas bawos.

Pawos 86

- (1) Sahanan wicara patut katepasi jantos pastika janten iwang patutnya malarapan antuk : Tri Pramana (bukti, saksi, miwah ilikita).
- (2) Pamutuse patut tan maren nepek ring Catur Dresta (Sastra, Purwa, Loka, miwah Desa Drestane).

- (3) Sahanan pamutus patut tan maren ngupadi :
- ha. Mangda Warga Desane sayan pastika uning ring wawatesan patute.
 - na. Mangda sang kaon, tatas uning ring kaiwangan deweknya.
 - ca. Sang molih tan maren katuntun mangda sampun bas nginggilang kapatutannya. Lila legawa ngampura sang sisip.
- ra. Nyasap bibit-bibit papinehe mamusuh-musuhan.

Pawos 87

- (1) Bendesa Pakraman patut nunasang pamatut ring sang rumawos, prade wenten Warga Desa amandel ring pamutusnya, bilih-bilih yan punika sinanggeh ngawenang duskretan Desa.
- (2) Warga Desa sane tan cumpu ring pamutus Bendesa Pakraman wenang nunas babandingan ring pamidabdab ring kecamatan jantos ka Propinsi Bali (MADP, MMDP, MUDP).

Palet 2

INDIK PAMIDANDA

Pawos 88

- (1) Desa utawi Banjare wenang niwakang pamidanda ring Warga Desane sane sisip.
- (2) Paniwak inucap kalaksanayang olih Bendesa Pakraman utawi Kelihan Banjar nunggal manut dudonan.
- (3) Bacakan pamidandane luire :
- ha. Pangaksama ring ajeng banjar / desa
 - na. Ayahan panukun kasisipan.
 - ca. Danda artha (panawur kasisipan)
 - ra. Panikel-panikel urunan utawi (panikel / utang) dadendan.
 - ka. Upakara panyangaskara.

- da. Kasepekang.
- ta. Kanorayang / kawusang makrama.

Pawos 89

- (1) Pamidanda sane katiwakang patut manut ring awig-awig, pasuara parareman utawi dresta miwah agama, miwah adung ring kasisipane.
- (2) Agung alit pamidandane sane katiwakang masor singgih manut ring kasisipane.
- (3) Jinah utawi raja brana pamidandane ngranjing dados druwen Banjar utawi Desa manut dudonan.

Pawos 90

- (1) Krama sane langkungan ring 3 (tigang) sasih amandel utawi negungin urunan, miwah dedandan wenang karampag.
- (2) Tata carane ngrampag patut tan mari kadi ring sor :
 - ha. Kalaksanayang olih Kelihan Banjar, kasarengin Krama pinaka saksi kuehnyane 3 (tigang) diri.
 - na Sang karampag tan dados ngalangan sang ngrampag, saha tan maren sareng nyaksinin pamargin rarampagane.
 - ca. Sang ngrampag sangkaning darsana ngambil barang-barang rarampagan :

Akwehnyane manut ring agung alit utang krama utawi nyawenin tanem tuwuh (tatangunan) sane karampag.
 - ra. Kelihan Banjar miteketang mangda barang rarampagan nyane gelis katebus masengker asasih (30) tigang dasa rahina, yening sampun lintang ring asasih (30) tigang dasa rahina pacang kalelang.
- (3) Rerampagane kasengkerin, mangda sampunang jantos :
 - ha. Nganenin saluir barang sane patut inggilang manut agama miwah dresta.
 - na. Ngicalang cihna kamanusan sang karampag.
 - ca. Mademang usaha pangupa jiwa sang karampag.

Saptamas Sargah
NGUWAH NGUWUHIN AWIG-AWIG

Pawos 91

- (1) Antuk pakarsan Krama Desa, Awig-awig Desa Pakraman Sidakarya puniki kengin kauwah-uwuhin manut kawentenan desane.
- (2) Nguwah-nguwuhin awig-awig inucap ring ajeng kalaksanayang antuk paruman Desa.
- (3) Sahanan pamutus bawos ring sajeroning nguwah-nguwuhin awig-awig puniki kautsahayang mangda madasar antuk suara gilik-saguluk (mufakat).

Pawos 92

- (1) Paruman indik nguwah-nguwuhin awig-awig puniki kamedalang olih Bendesa Pakraman Sidakarya.
- (2) Paruman kadi kecape ring ajeng taler patut kawentenang prade kawidhi olih Kelihan Banjar sanistane sareng tigang diri pinaka wakil soang-soang banjarnya.

Asthamas Sargah

PANUTUP

Pawos 93

- (1) Awig-awig puniki kawastanin awig-awig Desa Pakraman Sidakarya.
- (2) Awig-awig puniki kamargiang ngawit karareman.
- (3) Awig-awig Desa Pakraman Sidakarya sane lami manut pamutus parareman Desa, tan malih kamargiang, tur raris kasimpen.

Pawos 94

- (1) Bendesa Pakraman kala ngamargiang sadaging awig-awig miwah utsahang Desa, patut tan maren :
 - ha. Saeloan miwah mawirasa ring sahanan prayogya sane taler ngawiwenang warga desane, upami Perbekel miwah Prajuru-prajuru sane lian-lianan.

- na. Ngwentenang galah pangala Desa mangda warga Desane polih ngupadi pangupa jiwa, nincapang pangaweruh miwah usahan niri-niri tiosan.
- (2) Sakaluring sane durung kabawos sarga ring awig-awig puniki patut kamargiang manut cara sane sampun ketah mamargi kadulurin antuk pararem-pararem.

Pawos 95

- (1) Nguwah-nguwuhin awig-awig puniki kararemin duk rahina sukra kliwon, wara pujut, tanggal 13 sasih kapat icaka 1934, tanggal masehi 28 september 2012 magenah ring Pura Mutering Jagat Dalem Sidakarya, Desa Pakraman Sidakarya.
- (2) Nguwah-nguwuhin awig-awig puniki kalingga tanganin olih Prajuru Desa, Prajuru Sabha Desa, Prajuru Banjar, lan Kepala Desa.
- (3) Luir sang ngalingga tanganin :

Sidakarya, 28 September 2012

PRAJURU DESA PAKRAMAN SIDAKARYA

BENDESA DESA PAKRAMAN SIDAKARYA



I NYOMAN KANTUN, S.H., M.M.

KEPALA DESA SIDAKARYA

KELIHAN SABHA DESA



I NYOMAN SUDARMA, B.A.



I WAYAN ROMI, S.SOS.

PRAJURU DESA



1. PANYARIKAN : I MADE SARJA, S.H.



2. PATENGEN : DRS. I WAYAN PUSPA, S.H.

3. BAGA-BAGA :



3.1 BAGA PARHYANGAN : 1. I WAYAN REKA



2. I MADE MUDRA



3.2 BAGA PAWONGAN : 1. DRS. I MADE SUNARKA



2. I WAYAN RENA, S.E.



3.3 BAGA PALEMAHAN : 1. I MADE PURYA



2. I KETUT WIDYA

PRAJURU SABHA DESA



1. PANYARIKAN : I KETUT SUKA, S.IP.,M.PD



2. PATENGEN : I KETUT MARSA, S.E.

3. BAGA-BAGA :



3.1 BAGA PARHYANGAN : 1. I KETUT DASTIRA



2. I KETUT DARMAWAN, S.ST.



3.2 BAGA PAWONGAN : 1. DRS. I WAYAN RUDEH



2. I WAYAN ARTHA, S.H.



3.3 BAGA PALEMAHAN : 1. I GUSTI PUTU SUTA



2. I WAYAN KAWI

PRAJURU BANJAR DUKUH MERTAJATI



1. KELIHAN : I MADE RUSNA



2. PATAJUH : I MADE SUARDANA, S.H.



3. PANYARIKAN : I WAYAN NARTA, S.SOS.



4. PATENGEN : I WAYAN PUJAYASA

PRAJURU BANJAR TENGAH



1. KELIHAN : I KADEK RUDY ARTAWAN



2. PATAJUH : I WAYAN SUKADANA



3. PANYARIKAN : I WAYAN SUKADANA



4. PATENGEN : I WAYAN SUKERTA

PRAJURU BANJAR SEKAR KANGIN



1. **KELIHAN** : **I NYOMAN SUTA ADIYASA**



2. **PATAJUH** : **I NYOMAN DURNAYASA**



3. **PANYARIKAN** : **I KETUT CITRA**



4. **PATENGEN** : **I MADE SUKAYANA**

PRAJURU BANJAR SARI



1. **KELIHAN** : **I KETUT SUBITAYASA, S.E.**



2. **PATAJUH** : **I NYOMAN SUDIARTA**



3. **PANYARIKAN** : **I KETUT MUNDRA**



4. **PATENGEN** : **I MADE SUARJAYA**

PRAJURU BANJAR SUWUNG KANGIN



1. KELIHAN : I WAYAN SUKADANA



2. PATAJUH : I KETUT NADA



3. PANYARIKAN : I KETUT ADI ARIAWAN



4. PATENGEN : I WAYAN DARMA

PRAWARTAKA
NGUWAH NGUWUHIN AWIG-AWIG LAN
PANYURATAN PARAREM DESA PAKRAMAN SIDAKARYA
KECAMATAN DENPASAR SELATAN.

- Pembina : 1. Kepala Desa Sidakarya
2. Kelihan Sabha Desa Pakraman Sidakarya
- Penanggung Jawab : Bendesa Desa Pakraman Sidakarya
- Ketua : I Made Suardana, S.H.
- Sekretaris : I Nyoman Suwana, S.S.
-
- Komisi I : Bidang Caturtas Sargah
- Ketua : Drs. I Wayan Puspa, S.H.
- Anggota : 1. I Made Renu, S.H.
2. Drs. I Wayan Rudeh
3. I Wayan Suketa, S.E.
4. I Made Mudra
-
- Komisi II : Bidang Pancama Sargah
- Ketua : I Ketut Subitayasa, S.E.
- Anggota : 1. I Made Sarja, S.H.
2. Drs. I Made Sunarka
3. I Ketut Monjong
-
- Komisi III : Bidang Sad Sargah, Saptama Sargah, Dan Astama
Sargah
- Ketua : I Wayan Artha, S.H.
- Anggota : 1. I Ketut Nada
2. I Ketut Marsa, S.E.
3. I Wayan Rena, S.E.

Komisi IV : Bidang Pararem
Ketua : I Ketut Suka, S.Ip., M.Pd.
Anggota : 1. I Wayan Suarta, S.H., M.H.
2. I Wayan Darma
3. I Wayan Narta, S.Sos.

Sidakarya, 28 September 2012